

» խնկելով: — Ասկէ վերջը պատրիարքն
 » հանգիստ ապրեցաւ քիչ մ'ատեն, և ապա
 » հանգեալ ի շնորհս Աստուծոյ, որ գո-
 » վեալ ըլլայ, Տուրի ամսոյ հինգին (որ
 » համեմատի դեկտ. 27-յանու. 25), ի
 » նոյն վերոյիշեալ տարին, և թաղուեցաւ
 » ի վանս Ս. Յակովբայ Զերեդեան յԵ-
 » րուսաղէմ: — Սա ազնուաբարոյ անձ
 » մի էր, գեղեցիկ տեսքով, վայելուչ հա-
 » սակաւ. երեսըն մօրուօք և մուղղօք պա-
 » տած, որ ալեւորած էին, և տարւօքն
 » այլ իբրեւ ութսունամեայ էր »:

Այս նկարագիրս անտարակոյս յայտնէ՝
 որ Արուսահլ անձամբ տեսեր և ճանչցեր է
 իր պատրիարք կոչածը. ափսոս, որ անունը
 չէ գրած, կամ թէ կամաւ լռած է, ինչ-
 պէս և անոր ժամանակակից և ազգակից
 Երուսաղէմի եպիսկոպոսին անունը, որոց
 վրայ ըսուած պժգալի գրպարտութիւններ
 յիշէ, վկայելով այլ որ նախանձոտաց չա-
 րախօսութիւն ըլլան և անստոյգ:

« Կ'ըսուի, թէ յԵրուսաղէմ նստող Հայ
 » եպիսկոպոսն՝ տեսնելով որ ամենքն կ'եր-
 » թան տեսնուելու այս սուրբ պատրիար-
 » քին հետ, իր ազնուական բարուց հա-
 » մար, նախանձելով վրան՝ թոյն խմցուց,
 » և մահը պատճառեց: Բայց Աստուած